

靜

娛

亭

筆

記

靜娛亭筆記目錄

卷十二

蔣叔起方伯工詩 科名佳話

一韻詩 吳南屏

王壬秋孝廉 朱香生少尉

官有三難 嚮壻

文潞公詩 騎鸞引

厚德錄 雋語雜錄

曾文正公楹聯 俞太史楹聯

集古成聯

寓言可味

古人重年誼

冰溪草

定數

靜娛亭筆記卷十二

賀縣張培仁子蓮

蔣叔起方伯工詩

德清俞蔭太史

樾

曰舊篋中尚有蔣叔起

超伯

七古

一章其題云天祺節扈游同樂獲窺福海瑤臺之勝
歸而得讀大集率成奉柬蓋是時叔起猶官比部值
樞廷也詩曰昨游崑閩循丹梯海天一碧指瑤瓊
雲韶樂分坐立部雜婁鼓動騰雙猊球陽使者適來
觀瓜果頻見中璫齋屬車扈從豈不好顧我野性同

山麋歸來袒衣復不幘。欲裹廠布師岐黎。急開君詩掃煩暑。爽若快雨驅霆霓。君身具有廣長舌。下筆便掩閭浮提。奇奇怪怪讀難識。不但猷猷兼撐黎。俗兒所藏鼠角耳。如君乃握天曹犀。草書况逼肚痛帖。才翁兄弟應難齊。隱居吳中亦不惡。時有後懊花閒啼。我詩相貽警礪礪。乃辱報之金裘蹄。從來南斗醉如泥。祿命恣人來取攜。惟當畱氣煖。下臍勞生何者非。夏畦此詩神味絕。似坡公奇恣可喜。

科名佳話

俞太史云道光癸未歲杜石樵先生視學吾浙四月

八日按試吳興適得相國文正師泥金之報乃題聞

喜軒於試院東楹同治辛未丁濂甫同年紹局視浙

學亦於四月八日隸試吳郡而嗣君立瀛進士捷音

至乃又顏其室曰疊喜宗湘文觀察時守湖郡賀以

詩濂甫和之其詩云聞喜名軒事亦奇師門遺墨尙

淋漓四千里外登龍日五十年前噪鵲時艷說宮花

分棣萼姪立幹戊辰進士敢云階樹盡瓊枝吳興太

守多情甚貽我瑤箋索和詩余和詩云試院論文正

青女山金言 卷一 二
賞奇興來酒味不嫌漓自從老杜畱題後又見雙丁
競爽時藝苑流傳稱盛事師門珍重茁孫枝阿翁聞
喜軒中坐盞喜還成盞韻詩

父子科名家聲克振海內不多見也余子雖列
賢書一行作吏無復登瀛之望錄此詩以志健
羨之意

一韻詩

華亭黃唐堂先生之雋生日對菊述懷爲一韻體詩

凡生平官位及所經歷事俱借一花字傳出詩云南

斗吾初降東籬爾正花秋容占晚節春夢憶浮花陶
宅毵毵柳春容瑟瑟花乾坤鄉外客山水道旁花湘
楚天如畫楊吳女似花烏啼薊門樹鸚語日南花記
室蠻牋檄歌塲羯鼓花淬磨歐冶劍攀折廣寒花玉
作排班筍金爲歸院花趨朝五更漏倬直八磚花官
解三條燭征軺四照花賁鏞巡泮壁衡鑑拔江花宦
拙顛盈雪精衰目炫花遂辭公廩粟還對故園花薄
翠平安竹新紅富貴花生涯殊草草世界儘花花天
竺尋湖艇長干訪雨花漫遊瓜印雪微笑手拈花志

館叢殘稿詞壇爛漫花纂修既陳迹鴻博又虛花廣
座經揮麈鈞天樂散花杖藜扶足力啜茗潤心花化
入莊生蝶幻開湘子花庚將八秩滿甲過一周花葭
白一方水楓紅二月花重陽對風雨旬日斷煙花天
到隨陽鳥地生延壽花門墻聯玉筍童茁琪花徑
掃初來客筵開亦坐花幾叢霜下藥十色盎中花豈
祝期頤算聊娛隱逸花顏齡當素節幽賞答黃花

一韻到底詩中罕見格奇而詩句清新韻同而

筆法矯變 武林郁滄浪爲友人題灌花圖調

寄醉太平亦用花字韻到底詞云杜陵浣花君
家灌花花田花塢花花向花茵坐花金鈴護花
金瓶供花司花女子如花定羞花妒花 判誇
五花陣誇六花原來過眼虛花且橋前醉花餐
花嗅花拈花語花相看傾國名花並春風笑花
作者悟拈花之禪讀者如評花之樂

吳南屏

曾文正推巴陵吳南屏 敏樹 之文爲文中逸品今錄

其聽雨樓記云度地不廣六而攬納宏遠者惟高且

顯者爲然而山居之所非有平泉曠壤通川之流而
其爲山岡阜堆復無巖竇泉石之奇峰嶺之秀加以
屋舍烟火之湊密兒童雞犬之聲雜聞於耳若此而
求爲堂房林院之勝以資讀書之暇娛者蓋難言之
余之居適類是常憾之欲別遷徙然余村之西南洞
庭之別浦也遠樹外常見湖光水色又近而磊石之
山浮動乎其前也東北則雲峰疊起數十百里隱見
皆可得惜其蔽於近而無以發之耳一日余弟雲松
指其西隅草屋數間廝備所居者曰此可卽而爲也

用力不大勞而得景當殊異余弗敢信之且止以隘
不聽遂鑿其垣爲門向山間崇而重之以爲樓斬竹
木剔土數尺廣數丈長竟畝而爲之圃以當其門圃
中移蒔花木略具而房樓連間疏達明潔纔兩月工
成余喜而上於樓以觀則凡湖與山之獻於欄檻而
入於窗牖者向未知其有此也而村落之遠近田疇
之上下山溪之曲折耕夫樵人之往來歷歷在目於
是與雲松對設榻樓上皮書而讀之而名其樓爲聽
雨也

王王秋孝廉

湘潭王王秋孝廉

開運

幼喜讀書爲文章有奇氣年

三十餘益棄俗學專力於古通尚書毛詩公羊傳及
史記漢書性高曠不事榮利朱香生少尉曰咸豐時
天下大亂將帥多開幕府招致才俊曾滌帥尤稱好
士布衣或起家爲布政司隻身來投歸資鉅萬士爭
自效王秋獨爲客不受事往來軍中或旬月或數日
卽歸久之曾公幕客皆得優保均執弟子禮而王秋
依然抗禮爲座上客嘗至江南督署晉謁曾公未報

遣使招飲王秋笑曰相公以我爲餽餒來乎卽携褰乘小舟去相公追謝之已歸矣著有湘綺樓集

朱香生少尉

甘肅朱香生

克敬

官湖南龍山縣典史有惠政能得

民心咸豐十一年寇擾其境城中危甚縣令與千總思遁去少香獨率吏民激以大義相約登陴堅守賊屢攻之民皆樂爲典史用均不顧身務爲守禦計賊攻四月知不可下乃去大憲聞之乃劾令而舉尉請於朝卽以尉擢龍山令格於例不果久之以盲去

官自以少壯爲詩不能精壯既盲日令人誦古人詩
默而識之更爲詩佳者往往似姚合雨後云小園微
雨霽瀟灑晚如秋風過涼生竹雲開月滿樓梵聲穿
樹出花影隔簾浮多病孤涼夜開軒學卧游送陳右
民觀察寶箴云舊時朋好去聯翩送子西征更惘然
可語性情能幾輩不堪離別更中年浮湘歲月騷人
淚酌古經綸內業篇從此孤懷向誰是春風吹夢夜
郎天闔外云闔外臣鄰長人間富貴衙春風颺賜樂
晴日絢高牙世局彌縫苦恩門責望奢格天殊不易

慎勿羨榮華又快意持旌節從容鎮一方性情長樂
老功業半閒堂國困官仍富民凋俗更强野人多過
慮咒柱獨傍皇又柳驪鶯留客花開蝶侑樽雲寺鐘
聲漫晨窗客夢幽皆佳句可誦者

官有三難

宋彭乘墨客揮犀鄭希仲云凡仕宦有三難一爲統
十萬之眾而爲帥二爲翰林學士值國家有大典禮
應撰進奉文字三宰劇邑賦稅多獄訟繁又有世家
豪族遇事多有把持三者苟非其材則事必隳廢除

青女詞言卷一
是三者雖宰相猶可以常才兼之

鬻壻

今人榜下擇壻號鬻壻其語本諸袁崧亦有意不願而爲貴勢豪族所逼不得辭者

文潞公詩

文潞公住洛日年七十八同時有中散大夫和昫朝議大夫司馬旦司封郎中致仕席汝言皆七十八嘗爲同甲會各賦一詩潞公詩曰四人三百二十歲況是同生丙午年招得梁園爲賦客合成商嶺采芝仙

清談疊疊風盈席素髮飄飄雪滿肩此會從來誠未
有洛中應作畫圖傳

騎鸞引

高疏寮有騎鸞引一詩奇麗可喜詩云夜騎白鶴出
琳闕千萬仙官翔佩玦雲雷貼妥過罡風左推日九
右扶月一息瑤池翠水家阿母迎謁龍驅車青娥彈
絲玉妃酒折盡蟠桃紅玉花九天丈人來問道太極
之前天不老丹霞一氣玉虛宮寶笈金繩容探討錢
春唐紀夢云翠峰嵯峨三十六寒泉落空響哀玉登

花石路勢縈紆。玉闌干護修筠綠。雪髯老人負紫瓢。
金絲麈尾遙相招。紅螺酌酒湛湛碧。坐倚蒼石次洞
簫。孤鶴來傳天上詔。老人挽余偕一到。飄飄高處凌
青冥。直過罡風履黃道。祥光樓閣倚崢嶸。神虎守關
森衛兵。雙闔朱扉忽微啟。中有靈官來遠迎。絳衣持
斧立丹陛。玉皇手中玉如意。雲璈風瑟自宮商。天聲
清越非人世。帝旁青童傳帝宣。文華宮中呼謫仙。謫
仙顧余笑且言。子宜亟反來他年。探懷贈我五色筆。
子當保之慎勿失。濃香氤氳迷帝所。長揖老人下西

無身從日月上頭行。俯視斗杓分子午。雲氣相隨步
武生。過耳但覺松風鳴。覺來握筆紀佳夢。月明樓鼓
擗三更。毛吾竹釣天曲云。鳶飛魚躍。鳧短鶴長。各
適其適。孰尤彼蒼。奈何人異於萬物。身備乎五常。學
關乎經濟。志效乎忠良。乃使蝸蚓同槁乎土壤。鴻雁
俱逐乎稻粱。精神所著。夢游八荒。浴銀河翻月之浪。
熏旃檀帶露之香。戴芙蓉九華之冠。披雲錦五色之
裳。騎祥麟兮翳綵鳳。攀若木兮拂扶桑。直造乎玉皇
香案之旁。白虎守關。御劍芒。癡惑執法。齒髮張。臯瓊

且與列雁行。肅然鳴佩。諧宮商。闕張衛霍。立兩廂。相
向盾甲。明如霜。千官拜起。低復昂。星輝霞燦。降百祥。
一人殿中立。宣揚令。臣奏事無恐惶。臣愚幸覩天日
光。願拜短疏。裨毫芒。讀罷帝親把袖藏。曰汝所奏見
未嘗。政如藥性和溫良。一一可以瘳民瘡。又如百鍊
昆吾鋼。用之國可無妖祥。惜哉不遇。徒心傷。亟宜入
世朝。君王君王神聖今禹湯。勤求賢雋。食不遑。扶天
大象。親提綱。充庭至寶。皆琳瑯。尙憐空谷遺幽芳。蒲
輪鶴詔紛相望。賜汝紫綬黃金章。袞衣赤舄坐廟堂。

燮調萬化躋時康。凌轍周漢追虞唐。賜汝斧鉞羽林鎗。專征不義誅暴強。火鈴霹靂杵金剛。攝伏百怪回瀾狂。載命玉女斟霞觴。賜汝天醞九霞漿。一飲盡蛻凡肺腸。令汝身貴家亦昌。不論中國蠻與羌。蟲魚草木皆春陽。天子萬壽永無疆。汝乘白雲來帝鄉。二十八宿參翺翔。臣辭草茅不敢當。遜於稷契暨及斯。罡風滿路明月在牀。諸作皆不食人間煙火語而鈞天曲尤富贍。見宋人隨隱漫錄

厚德錄

宋李元綱厚德錄多載巨人長德忠厚之事讀之足以啟人爲善之心今敬摘數事於此

李繼隆討夏虜與轉運使盧之翰有隙欲陷之乃檄轉運使期八月出塞令辦芻粟轉運司調發方集忽而改期轉運司遂解散芻粟旣而復爲檄云賊且入塞當以時進軍芻粟卽日取辦是時民輸輓悉散倉卒不可復集繼隆隨劾轉運司以乏糧悞軍務大宗大怒令召中使一人令取轉運使盧之翰等首級丞相呂端樞密使柴禹錫皆不敢言惟樞密副使錢若

水爭之請推驗有狀然後行法上怒拂衣起入禁中
二府皆退若水獨留庭中不去上既食久之使人偵
之復曰有細瘦而長者尙立庭中上出詰之曰爾以
同州推官再期爲樞密副使朕以爾爲賢故擢任爾
乃不才如此尙留此安待對曰陛下知臣使待罪二
府當竭其愚慮以報厚恩陛下據李繼恩一幅紙卽
誅三轉運使鞠驗事狀明白乃加誅戮又何晚焉獻
可替否以死守之臣職也臣未獲死所故不敢退上
意解如若水議先令責狀許之三人僅謫官旣而知

虜欲入塞事虛繼隆亦去位

凡有假公事以害人者安得錢公化身千百以解其厄也

趙康靖公繫與歐陽永叔同官禁近歐陽公常薄之以爲不文乃出之後復入竟知封誥歐甥女嫁後與人亂事覺語連及歐歐時爲河北都轉運使疾之者欲文致其罪云歐與甥女亂事聞於上上怒獄頗急羣臣無敢言趙公乃上書言修以文學近臣不可以閨房曖昧之私輕加誣讒臣與修蹤跡素疏修之待

臣亦薄所惜者大體耳書奏歐公得免窮究出知滁州趙公後官翰林學士復表讓以歐某先進臣不可先爲學士奏雖不報時論美之

至和中趙閱道與范景仁有隙後王介甫執政素惡景仁毀之於上前且曰陛下問趙抃卽知其爲人他日上以問閱道對曰忠臣上曰卿何由知其忠對曰嘉祐初仁宗不豫范鎮首請立皇嗣以安社稷豈非忠乎既退介甫問之曰公不與景仁有隙乎閱道曰不敢以私害公

王達者郎中李曇僕也事曇久曇親信之既而達應募爲兵入捧曰營矣會曇之子學妖術妄言父子繫獄曇平生執友無一人敢餉問之者達旦夕守護供給凡四十餘日不倦後曇貶恩州別駕達哭而送之防者遏之使退達流涕曰此吾舊主安得不送其家中諸僕已辭去曰吾等不能從公入瘴鄉以求死也曇卒於道達爲之棺斂朝夕哭如喪其父及葬而後去嗚呼達一賤隸非矯節以求令名取祿仕也獨能發於天性之誠不顧罪戾以救其故主終始無倦豈

不賢哉今世士大夫因人之力或致顯榮已而故人
或臨不測之患懼禍之及已往往遠而避之甚或擠
之以明無黨肯憂卹振救者鮮矣稽其行事五夜捫
心應亦羞見此僕

溫公涑水紀聞

許冑士人張孝基娶同里富人女富人只一子因不
肖斥逐於外富人病且死盡以家財與孝基孝基治
後事如禮久之其子丐於塗孝基見之惻然謂曰汝
能灌園乎答曰能即使之灌園園蔬日茂久之謂曰
汝能管庫乎答曰灌園已出望外況管庫乎又何幸

也卽使之筦庫亦馴謹無過孝基徐察之知其能改
過故態已除以其父所付財產歸之其子從此溫飽
爲鄉里善士孝基卒後其友遇之見旂幘騶御如守
土大臣驚喜揖問何以致此大位孝基曰吾以還財
之故上帝嘉之命爲嵩山之神言訖不見

當建炎時追封諸直臣有贈侍御直龍圖閣學士封
云士有屈於生前伸於歿後者方其臨事執義以行
其志亦奚暇擇利害於當時而冀顯榮於今日哉是
可嘉嘆也爾以直道執憲不回是爲稱職而擅權誤

國之人方且嫉惡而排斥之今公道昭彰龍圖寓直
職號清華精爽尙存歆予褒寵紹興己卯正言先生
除監察御史制云先帝有賢御史以讎獄不撓忤柄
臣至流落以死朕常伸褒錄之典今有令子克濟其
美以爾樂道修身勇於爲善峩冠在列有粹然安靜
之風其以栢寺雄職爲予司聰

此追錄諫臣之敢言者一褒其節一錄用其子
足見藝祖忠厚傳家之美明代高拱竟詆徐文
貞公爲暴揚先朝過失者是欲阻新君好善之

心而令直道永遠不彰也卽此一言罪通於天
地獄之設殆爲此人

蘇子瞻曰慶歷三年有李京者爲京師小官時吳鼎
臣爲侍從二人相與通家一日京薦其友人於鼎臣
求聞達於朝廷鼎臣卽繳其書奏之京坐貶官未行
京妻謁鼎臣妻取別鼎臣妻慚不出京妻立廳事召
鼎臣幹僕語之曰我來旣爲往還之久欲求一別亦
爲乃公嘗有數帖與吾夫禱私事恐汝家終以爲疑
索火焚之而去

晁氏客語曰元祐中舉子吳祐應大科以行卷徧投從官一日與李方叔同視文理乖謬撫掌絕倒范純夫出覽其文畢不笑不言侍坐者不敢問他日吳祐請見純夫諭之曰觀足下之文不足應大科也此必有人相悞且習進士舉業可乎吳面發赤逡巡而去後竟改業純夫之正告吳之肯以俱可風世

兗州有民婦姓賀氏里人謂之賀織女初嫁時未浹旬夫卽出外經商不以一錢濟其母又無賴人皆指爲不孝子所得微利別於他處置外婦賀知之每夫

還但欣然侍巾櫛其夫轉以非理毆罵之婦不與校
其姑老病凍餒婦則傭織以資之己則寒不營衣飢
不飽食姑又不慈日有凌虐婦益恭順承意旨雖閨
室亦無怨嘆夫竟挈其外婦至家婦以妹呼之殷勤
接待略無愠色厯二十餘年始終無怨懟此婦生於
貧賤未聞禮義之訓而能如此雖古之賢孝無以過
也孔子曰十室之邑必有忠信諒哉

范資玉堂閒話

韓許公

億

在中書日嘗見天下諸路職司拮據官吏

小過輒顏色不懌曰今天下太平主上之心雖蟲魚

草木皆欲得所夫仕者大則望爲公卿次則望爲待
從職司二千石其下亦望爲京朝幕職奈何錮之於
聖世其持心如此昔袁安不以贓罪鞫人其韓公之
謂乎

舊制選人皆用卑官奏舉乃得京寺官而士有孤寒
不爲人知者往往抑塞以老陳節使堯咨掌銓時特
爲陳其功狀而擢之

葉左丞

夢得

云余在許昌歲值大水餓殍滿野盡發

常平倉以賑之稍能全活惟棄小兒極多無人收養

青女曰金言 卷一 一
往往顛踏於路視之惻然因問左右曰人之無子者
何不收以自畜乎答曰人固願得之但患既長或來
識認耳余爲閱舊法凡遺棄小兒其父母不得復取
乃知爲此法者亦仁人也夫彼既棄之父母之恩已
絕若人不收之其誰與活乎遂出示徧告百姓並官
爲立券記籍凡得小兒者使報之於官官卽與券而
籍記之凡得遺棄小兒三千八百餘人皆奪之溝壑
而置之襁褓者願以告臨民之君子

撫養之德比於親生此一定不易之理後儒援

引典禮反覆千言總不過發明此義耳聞吳中某狀元係其父某爲太守在粵東所收之棄兒也並聞某相國亦其父官浙江典史時所撫養者他如蜀川之某相國長白之某爵相皆有此說雖不足盡信亦可見醴泉無源芝草無根矣仁宗時朝議在官七十而不致仕者有司按籍劾之翰林學士胡宿以爲養廉耻厚風化宜有漸而欲一切以吏議從事殆非所以優老勸功之意當少緩其法使人得自言而全美節朝廷嘉其言至今行之

仁宗惡贓吏時士人亦有才高而不能事上官者或
上官以私忿而摭摭米鹽細碎以爲贓者遂永不得
進用衆以爲冤知制誥右正言知流內銓吳育奏應
選人如犯贓私除情罪重者無復在官其餘罪名雖
同事體不一或以微物致累或以周防偶虧若顯有
才能並許奏舉

林積南劍州人少時至京師息旅邸既卧覺床第間
有物揭視之見布囊中有錦襪裹北珠數百顆乃揭
其名於室曰某年月日劍浦林積過此欲見者至京

師相訪乃去遺珠人乃巨商也急回故道至蔡邸舍見其題字卽至京訪林於上庠林具以告曰珠在是可投牒府中當悉以歸商如其教林詣府官爲細詰實係是商所遺乃以珠悉歸之商欲分半與之秋毫無所取商乃就佛寺作大齋曰爲林君祈福林後登科至大中大夫子德新吏部侍郎子孫蕃衍至今爲閩中巨族

夷堅志

晁文元迥嘗言歷官臨事未嘗挾嫌害人擠人以干進每遇被屈抑之人察其無辜必爲之保全回護如

自衛其髮膚者

見王定國近錄

李相國沈曰以帷箔之罪加於人者最爲暗昧萬一非辜則令終身被譴而受惡名至使君臣父子之間難施面目言之得無訟乎

華陰呂君舉進士聘里中女既擢第歸家言曰吾女故無疾既聘而後盲敢辭呂君曰既聘而後盲非君欺我也又何辭遂娶之生五男皆中進士第其一卽丞相汲公也

見陳無已叢談

此又一劉庭式矣夫婦爲人倫之始在德不在

色抑情重信宜其後裔昌熾矣近日巴陵方菊人廉使之封翁及余同年李鶴人中丞並有此盛德事可敬也

撫言

唐重進士王公

保定

撫言言之詳矣今錄其有關掌

故者使讀書應舉者有所興起而知科名之榮我者非第爲身計也

進士科始於隋大業中盛於貞觀中縉紳位極人臣不由進士者終不爲美其得之艱難謂之三十老明

經五少進士

言進士飛騰之速也明代傳奇有老門生三世報恩之事言有一少年進士謁選得粵西縣令分校鄉闈所薦拔之房首乃一五十餘之老門生也以其老意頗厭之後此生成進士觀政刑部令亦內升以寧人獄有權貴欲置之死賴此生而免後得復官子居鄉多不法已罹大辟此生巡按其鄉爲之設法竟得免其孫式微窮困此生已爲顯宦資助之又得讀書成名所謂五

十少進士良然今則翰林尙有驟遷者倘五十
登第用部屬則需二十年方得外轉道府縣令
則十年方得補缺邀遷擢者百中無一再加丁
憂降調等事則升擢時總在七十外矣古稀之
年殊不易見懷才而抑鬱以卒者正不少也

進士登科初以考功主之開元中員外郎李昂力杜
請託而昂之外舅舉李權昂召權庭斥之又斥其文
字之疵權拱而前曰執事以某文爲不臧執事詩云
耳臨清渭洗心向白雲閒唐堯旣耄將禪於許由由

故有洗耳之舉今天子春秋鼎盛並不揖遜於足下
何以洗耳哉昂聞之皇駭訴於執政朝廷以卽官權
輕自是改用禮部侍郎

裴思謙狀元及第作紅牋名紙十數詣平康里因留
宿賦詩曰銀釭斜背解明珠小語低聲賀玉卽從此
不知蘭麝貴夜來新染桂枝香

盧肇宜春人與同郡黃頗赴舉頗富肇貧郡守餞頗
供張極盛肇策蹇而過明年肇狀元及第歸刺史以
下皆出迎接適看競渡肇席上賦詩曰向道是龍剛

不信果然奪得錦標歸

薛逢晚年厄於宦途嘗策蹇赴選值新進士綴行而出從者呵之曰避新卽君逢遣一介曰莫乞相阿婆三五少年時也曾東塗西抹來

元和中李涼公主試榜下三十二人及第皆取寒素時人有詩曰元和天子丙申年三十三人同得仙袍似爛銀文字錦相將白日上青天

李文饒當國頗爲寒峻開路及南遷或有詩曰八百孤寒齊下淚一時南望李崖州

沈雲翔十人多交通權貴時人譏之號芳林十哲
杜德祥放榜曹松等五人年俱七十餘時謂之五老
榜

張倬落第捧登科記戴於頭上曰此千佛名經也
平曾謁華州李相不遇吟曰老夫三日門前立珠箔
銀屏晝不開詩卷却拋書袋裏譬如閒看華山來
劉生魯風投謁所知爲典客所阻有無錢乞與韓知
客名紙生毛不爲通之句

趙牧效李長吉爲短歌可謂蹙金結繡而無痕迹

進士褚載投贄蘇侍郎誤犯其家諱載投啟謝過曰
曹興之圖畫難精終慙誤筆殷浩之矜持太過翻達
空函

鄭光業入試之夜將就枕有人突入曰可相容否光
業爲輟半鋪之地其人又曰更托取一杓水煎一椀
茶光業欣然爲取水煎茶未幾光業狀元及第其人
啟謝曰旣煩取水更使煎茶當時不識貴人凡夫肉
眼今日俄爲後進窮相骨頭光業有一巨箱凡行
卷有可嗤者卽投其中號苦海

裴庭裕在內庭文書敏捷號下水船姚洎號急灘頭
上水船

何涓爲瀟湘賦天下傳誦同時潘緯以古鏡詩著名
或曰潘緯十年吟古鏡何涓一夕賦瀟湘

雋語雜錄

司馬太傅爲二王題目曰孝伯亭亭直上阿大羅羅
清疏阿大王枕小名

郝嘉賓少有遵俗之概時人語曰大才槃槃謝家安
盛德曰新郝嘉賓

桓宣武曰殷深源有德有言若作令僕足以儀型百
辟朝廷用違其才耳

王愉字敬豫小字阿螭少好武其父爲丞相每見長

豫悅字則喜見敬豫則瞋

何元朗云文衡山在翰林大爲姚明山楊方城所窘
時昌言於衆曰我衙門不是畫院乃容畫匠處此至
今衡山筆墨長在天地間世豈有道著姚狀元津楊
狀元維聰者耶

柳南隨筆云崑山馮姬色藝雙絕以不應馬帥三寶

之召致千其怒遣健將縛至將加刃矣馬聞其能飲
先以酒困之立盡一斗乃解縛令理妝按歌聲愈清
色愈豔遂以千金爲脫籍寵之專房陳祺芳有詩云
酥胸藕臂玉爲腰縛出輕紅慘愈嬌剛向筵前傾一
斗寶釵重整度鸞簫

王斥漢河南南陽人崇禎辛未進士性好優友人以

喜筵招飲慕其名盛設以待王乃朱塗其面金冠綠
袍像關壯繆乘馬而往竟登席巍坐唱大江東一曲
其童倚笛和之引滿大嚼而去

薑露菴雜識中載鬥奇之句有可采奇句云者如洞
鑿控象作宛馬河伯結螭爲海梁險句云二分垂趾
懸厓側一髮懸帆惡浪中幽句云松杉老屋眠秋士
瓜果空庭拜曉星壯句云揚帆滄海封王去走馬天
山唱凱遣遊戲句云醜女簪花春有恨庸醫賣藥鬼
相隨青史聲名輸戲齣六經傳誦仗時文

曾文正公楹聯

曾文正公善爲楹聯題江西吳城會館戲臺云五夜
樓船曾上孤亭聽鼓角一尊濁酒重來此地看湖山

挽胡文忠云。逋寇在吳中。是先帝與盡臣臨終恨事。
薦賢滿天下。願諸君補我公。未竟勲名。挽袁端敏甲
三云。屬纊寄箴言。勸我勉爲范宣子。蓋棺有定論。何
人更議李臨淮。戴文節黜云。舉世稱畫師。無人識爲
血性男子。上界足官府。知君仍作供奉神仙。挽易臨
莊太守良幹云。鄧禹少從戎。壯懷忽吸西江水。終軍
雖遇害。毅魄猶殲南越王。挽凌子彥孝廉玉成云。曰
歸曰歸指故鄉。豈期露宿風餐。便爲異域招魂客。有
弟有弟今詩伯。從此孤兒寡婦。付與天涯急難人。挽

劉瞻巖殿撰太夫人云七州團練使八座太夫人愛
日忽頽鄉里榮哀天下羨哲嗣名狀元曾孫新進士
文星環繞高堂福壽古來稀

俞太史楹聯

俞蔭甫太史

楹

以詩古文詞名海內同治己己合肥

李太夫人七十生日時長公筱泉中丞撫浙少泉相
國以大學士肅毅伯督兩湖因題二聯爲壽分致中
丞相國其致中丞者云起居八座亦多壽亦多男先
百花生日祝慈蔭長春鳳舞鸞歌徧浙水東西洞庭

南北文昌六星有上相有上將以萬石家風佐熙朝
景運玉昆金友比荀龍滅二賈虎增三致相國者云
花下板輿來自皖而兩浙而三吳而瀟湘洞庭數千
里瞻拜慈雲鳳鳥舞鸞鳥歌頌無量壽佛牀頭朝笏
滿有子爲宰相爲節度爲觀察轉運五百年特鍾間
氣玉策賢金策聖作中興名臣壽潘玉泉觀察云以
名父子生宰相家有德業事功文章氣節當中興年
祝無量壽是英雄儒雅富貴神仙張友山中丞

兆棟

太夫人八十壽聯京國奉慈輿而秦而蜀而皖粵諸

邦。又向三吳開壽寓。元宵張夜宴。有子有孫有曾元。
繼起行看五代共華堂。王子勤觀察壽聯云舞綵滿
華堂。看膝前簪笏成行。以八龍兼三鳳。有子十稱觴
晉蒲酒。願林下康強逢吉。從夏五祝秋禾。李少荃爵
相壽聯云以歲之正。以月之令。春酒一尊。爲相公壽。
治內用文。治外用武。長城萬里。奠天子邦。杜後舫觀
察壽聯云仗名法入手。由鹽官起家。而陳臬而開藩。
意思蕭閑共識東坡。是五戒轉世紀近代戰功輯古
來謠語又工詞又能書精神淵著請歌南山之六章

壽楊石泉中丞壽聯云鍾三湘秀氣爲兩浙福星
奮武揆文恰值賓興大典借九日秋光獻五旬春酒
翔機集嘏恭逢御極初元金眉生廉訪壽聯云推倒
一世豪傑開拓萬古心胸陳同甫一流人物如是如
是醉吟舊詩幾篇聞嘗新酒數盞白香山六十歲時
仙乎仙乎佛殿聯云三藐三菩提與大眾同游淨土
一花一世界着我佛卽在靈臺

集古成聯

蓬萊文章建安骨 李白

龍馬精神海鶴姿

李郢

樊川詩句營邱畫

陸游

謝眺青山李白樓

陸魯望

室如明鏡心如水

袁桷

花有清香月有陰

楊巨源

千樹梅花萬竿竹

半潭秋水一房山

名標玉籍仙壇上

韋莊

詩在林逋魏野間

陸游

才子舊稱何水部

韓翃

使君疑是鄭康成

東坡

若信王侯等蠅蟻

陸游

不妨風月事琴樽

楊巨源

已用浮雲看富貴

陸游

好來平地作神仙

魏野

神仙富貴今何在

范成大

朝市山林且自由

袁桷

進退周旋必中禮

射義

恭儉莊敬而不煩

經解

陶令好文常對酒

郎士元

庾公逢月要題詩

楊巨源

海內文章在公等

元好問

壺中天地非人間

宋孝宗

常吟卷裏新酬句

張籍

願讀人間未見書

藍奎

且喜江山得康樂

錢起

豈知詞賦稱相如

盧綸

久無書去干時貴

司空圖

錯被人呼作地仙

陸游

野鶴巢邊松最老

羅編

碧桃花下景長閒

羅虬

松間倘許幽人住

秦系

海內無如此地閒

白香山

妙筆醉題紅芍藥

袁桷

碧窗留得玉蟾蜍

虞集

直上青雲生羽翼

李白

好來平地作神仙

魏野

嘯歌聊永日

李景儉

花月解留人

張謂

但得煙霞供歲月

回道人

欲將耕稼報昇平

陸游

閒身有樂事

陸游

幽鳥少凡聲

方干

鸞鶴會應霄漢去

李中

游心暫寄水雲間

劉淑

以上各聯皆金匱楊子延所集

寓言可味

俞蔭甫先生曰余少時嘗戲草骺骹子一卷中多滑稽之談今錄數事於此 伏羲畫八卦既成以示骺骹子骺骹子曰子畫卦以何爲始伏羲對曰吾始於一畫骺骹子曰子誤矣當始於一豎也夫一豎者引而上行則輕清爲天引而下行則重濁爲地是故一豎者天地之象也一畫者日月之象也日東而月西也今以一畫爲始將先有日月後有天地乎

堯在位七十載倦於勤讓於許由許由不受讓於巢
父辭焉讓於骹骹子骹骹子受之立爲天子三月而
返之於堯歸而見巢父巢父曰鄉者吾與子友也今
子受堯之天下非吾友也請與子絕骹骹子笑曰子
何視天下之重而視吾之輕也夫吾視天下之去留
猶蚊虻之過眼是故立爲天子而吾不以爲榮返爲
匹夫而吾不以爲高子將無以受天下爲榮耶
禹受命治水骹骹子問曰子意如何禹曰吾將鑿龍
門以受之骹骹子曰子未知治河也夫河出於昆侖

青女曰：言言卷之二
之墟千里一曲其曲也皆有大山以當其衝故河不
得而不曲也吾嘗登昆侖而觀焉其一曲有山焉是
曰公山其二曲有山焉是曰宣山子盍往而鑿之是
二山者苟能疏通之以利天下則天下之水自無所
滯此萬世永賴之功也禹不從卒鑿龍門導之制之
苟安以幸無患骫骳子嘆曰自此以後中國世有河
患矣

成湯出見人張網四面湯解其三曰欲左者左欲右
者右不用命者乃入吾網諸侯聞之曰仁哉湯也德

及禽獸矣。馘馘子曰：不仁哉湯也！禽獸猶罪其不用命，況諸侯乎？況臣下之凜威任事者乎？

伊尹放太甲於桐，往見馘馘子。子曰：子天民之先覺者也。子始耕於有莘之野，挾堯舜之道以要湯。後世以山林爲捷徑者，子覺之也。五就湯而五就桀，後世朝秦暮楚者，子覺之也。相湯而伐桀，而有其天下，桀固無道也。然後世以臣伐君者，子覺之也。已立太甲而又放之，後世置君如弈棋，不察其有德與否，只圖逞一己之私者，子覺之也。夫子覺者也，覺人多矣。

武王伐紂伯夷叔齊耻之逃於首陽山采薇蕨以爲食馮馮子載米三十車以餉之夷齊不受曰子之粟周粟也馮馮子曰子固以紂爲聖主以周爲非理乎子非鄉人乃公侯之子也以爲是而不仕以爲非而不能討旣以漠視家國之理亂而不問矣旣輕千駟萬鍾之富貴而欲追步巢許矣子胡不達之昆子之心有周耶薇亦周薇也蕨亦周蕨也子之心而無周耶子所戴之天猶商之天也子所履之地猶商之地也子所食之粟猶商之粟也

古人重年誼

又云辛未歲恩竹樵方伯錫開藩吳下相與唱和甚
歡余因言蘇州府學有宋紹熙間唱和詩石刻方伯
卽搦一紙見贈其首唱者建安袁說友和之者浦城
張體仁胥臺成欽亮浦城章澥胥臺唐子壽王藝勗
元功三山陳德明桐川周承勳浚趙彥衛趙彥瓊趙
彥真書石者歷陽龔頤正碑額分書同年醜唱四字
蓋諸君皆同年也袁公原唱云同年幾合幾分違三
十年間見日稀尊酒相逢今也幸詩書論政舊焉依

慈恩故事今回首吳地清談對落暉平世功名在公
等尙期努力佐龍飛前有范石湖序足見宋人同年
之重因錄於此云進士科始於隋盛於唐本朝因之
偕升者謂之同年衣冠之好由來尙矣唐人尤熹期
集燕設之名亡慮十數而曲江大會長安坊市爲半
空天子至御樓以觀當此時通榜之士意氣相予特
甚否則有紫陌青雲之譏本朝略去浮侈但存聞喜
一燕而爲之同年之制則加詳焉旣朝謝揆曰集貢
院奉賜第錄黃於香案列拜庭下禮畢更以齒班立

四十以上東序西鄉未四十西序東鄉推年最長者最少者更各一人升堂長者中立南鄉少者北鄉春官吏贊拜少者拜又贊答拜長者泊兩序皆再拜謂之拜黃甲叙同年所以明章風期惠篤心契委曲之意過唐遠矣士大夫甯得輕負此意忽然雲散異日相視如塗之人乎紹熙改元建安袁起巖張元善俱使浙西始以歲五日會同年之在吳下者於姑蘇之臺登臨勝絕傾倒情素獻酬樂甚賦詩相屬州里傳寫一夕殆徧好事者美之以爲伐木之詩也起巖謂

僕嘗誇春闈使爲序引僕時位下渠足數獨以親見
諸公貴名之起又嘉二使君能修舊好略記團使故
實以代揚解之詞庶凡稱同年者聞風動懷增重名
義或於雅道小有補焉非直爲一觴一詠設也二月
望石湖范成大書按此刻自來金石家未著錄惟錢
竹汀先生養新錄曾載其大略余讀范石湖序慨然
增同年之重輒依韻爲一詩擬徧徵諸同年和而名
位卑下未可主齊盟執牛耳聊發此議而已詩曰芙
蓉鏡下久睽違落落晨星比昔稀豈以雲泥今隔絕

遂忘蒲稗舊因依翔翔霄漢誰先路憔悴江湖已夕
暉記否鴟鵬初展翼烟波鷗鷺也同飛

昔人年誼如此之厚讀之憮然不禁有今昔之
感太史和章意極微婉亦有慨乎其言之也

冰溪草

張文毅公甫冰溪吟草中有七古一章讀之慘然序
云咸豐癸丑七月朔余在南昌守城督戰奴子鄭貴
侍側與材官哈恩俱斃於礮血濺余身今年矣感
而有作詩曰去年今日豫章城我在城頭督戰兵賊

礮如雨向城擊忽然鮮血濺我纓左右駭愕環相顧
中有二人中礮仆材官哈恩僕鄭貴淋漓血染城頭
路哈恩碎顱氣僅存鄭貴洞腹猶能言首問主人受
傷否次言有母乏養殮我聞此語心悲切世人枉自
談名節此僕二十不讀書臨死之言何烈烈人生忠
孝付於天我今報國知何年將母猶荷君恩重愧
汝國殤空淚漣

定數

陳子莊太令其元少時恃才自喜芥視青紫道光戊

子應鄉試試畢意得甚與數友游西湖適有請箕仙者子莊問今科中否盤中書曰爾甲子舉人也時戊子至甲子相去尚三十六年子莊意頗不然大言曰仙人不靈盤中又書曰靈靈靈相與一笑而散乃屢試秋闈一衿如故而距甲子之科亦不遠矣無何蘇杭大亂甲子科竟不舉行未幾子莊需次江蘇宰劇邑後因公事回杭州與數友湖上語及前事曰甲子未開科何從應試子以諸生得官仙人真不靈矣一友笑曰靈靈靈子於甲子之歲爲左季高制府所薦

左公疏云爲敬舉人材仰求錄用事然則子非甲子
舉人乎子莊乃憬然而悟信乎事皆前定也子莊宰
青浦時有歸思繪泖峰菴思圖俞蔭甫太史題詩云
之子有歸思秋來問水濱欲將種花手去作採菘人
煙雨扁舟活丹青一幃新鄉山九十九蒼翠撲船唇
我欲留君住青山負草堂我將勸君隱 丹詔惜循
良且喜宦游地依然雲水鄉何妨緩歸棹在此作龔
黃